

REGIONAL NEWS BULLETIN

Date – 14/04/2025 Time - 7:30 -7:40Hrs

HEADLINES (MORNING)

- The Mizoram Liquor Prohibition Act, 2025 chuan district council 3-te a huam tawh dawn.
- Thla thum kalta chhung khan Mizoram Excise & Narcotics department chuan ruihhlo cheng vaibelchhe 195 leh nuai 48 hu an man tawh.
- Mizoram leh Assam ramri buaina chingfel tuma sorkar official-te tun thla ni 25 khian Guwahati-ah inbe turin ruahmanna siam fel a ni.



EXCISE

Excise & Narcotics Department chuan tunhnai lawka Mizoram assembly-in a pawm, The Mizoram Liquor Prohibition Act, 2025 a pawm tak angin district council 3-te a huam tawh dawn.

Assembly dan siam hi Larsapin a pawmpui hnu-ah March ni 20 khan Mizoram Gazette-ah sorkar hriattirna tihchhuah a ni tawh a. Tun hnai a Excise & Narcotics Department-a Senior Officer leh District hrang hranga Assistant Commissioner te Crime Review Meeting-ah chuan Mizoram sorkarin wine siam phalna a pek 3-Hnahlan Winery, Tlangsam Winery leh B.CH Winery atanga siam chhuah wine chauh zawrh phal a ni thu tarlan a ni a. He mite ni lo wine emaw, alcohol tel in tur dang siam reng reng chu MLP Amendment Act, 2025 in a khap avangin man theih vek an nih thu leh dan bawhchhetute pawh na taka hrem theih an ni tih tarlan a ni a.

Hei bakah hian hmun hrang hranga hotel, restaurant, club, Homestay, leh intihhlimna hmun thenkhata zu, wine leh beer in tur leh lei tur atana hmuh tur awmte pawh MLP Amendment Act 2025-in a khap avangin man theih vek an nih thu an sawi a ni.



RABIES VACCINATION

Thenawm Manipur state a Mizoram dep Churachandpur district-a ui-a hri a len avangin tun lai hian Saitual leh Aizawl district-ah ui-a hri danna a ui chiutir an tam hle.

Akashvani Aizawl in thu a dawn danin kar kalta chhung khan ui 330 zet chu Aizawl Khatla a Mizoram Polyclinic Hospital-ah ui-a hri danna chiu tir an awm a. Thawhtanni khan ui 20 vel hri danna pek an ni a, Thawhlehni-ah ui 63, Nilaini-ah ui 105 leh Zirtawpni-ah ui 141 hri danna pek an ni bawk a. Ningani kha sorkar pisa chawlh a nih avang leh nimin piah kha tun thla a Inrinni vawi 2-na a nih avangin ui-a hri danna pek an awm lo niin Vety department hotute chuan an sawi. Aizawl leh Saitual district hi Manipur depa awm ve ve a nih avangin Churachandpur district-a

ui-a hri leng hi a rawn luh loh na'n theihtawp chhuah a nih thu department hotute chuan an sawi a. Saitual-ah chuan Ningani khan ran hriselna beihpui thlakin hemi ni hian ui 406 chu ui-a hri danna anti rabies vaccine (ARV) pek an ni.

Saitual District Veterinary Hospital-ah hian Ningani khan World Veterinary Day pualin ran hriselna a thlawna endik runpui "Animal Health Camp" huaihawt a ni a. Hemi ni hian Saitual leh Keifang mipui tan Vety Hospital Building a hun hman a nih bakah khaw thenawm, Rulchawm, Ruallung, Sihfa leh Dilkhanah insemdarhin hun hman zui a ni. Ui-a hri danna pek bakah ran dang chi hrang hrang entir leh zai a ni a, ran vulhna hmuna kal chilhte a awm bawk. he huna ran enkawlina pek hi 611 an tling a ni.

He tih lai hian Aizawl leh Saitual district magistrate bakah Serchhip leh Hnahthial district magistrate te chuan Manipur atanga ui leh uisa lakluh khapna thupek an chhuah a. Ui chhuah khapin an pawn chhuak a nih pawhin a neitu-in hru i a kaih tur a ni an ti a. The Mizoram Animal (Control & Taxation) Rules, 2016 in a phal angin a neitu tel lova khawlaia Vi chhuak te chu Village Council ten an man thei ang a. Ui neitu te hian nikhat zelah Ui chaw man Rs.100/- leh fine Rs.100/- chawiin an khul chhuah tir thei ang a. Ni 7 chhunga khul chhuah a nih loh chuan a remchan dan a lilama tih ral theih a ni ang. Ui khuahkhirh lohvin mihring a seh chuan Section 291 BNS, 2023 hmangin Ui neitu chu thla 6 (ruk) chhung lungin tan emaw Rs.5,000/- thleng emaw chawi theih a ni bawk.

District magistrate te thupek chhuah hi an tihchhuah atanga thla 2 chhung huam tura tih a ni a. Thupek bawhchhiate chu Bharatiya Nyaya Sanhita (BNS), 2023 section 223 hmanga hrem theih an ni ang.

<><><>

DRUG SEIZURE

Kumin January leh March thla inkar thla thum chhung khan Mizoram excise & narcotics department hnathawkte chuan ruihhlo cheng vaibelchhe 195 leh nuai 48 hu an man tawh.

An department thupuangtu Pu Peter Zohmingthanga'n a sawi danin hemi hun chhung hian crystal meth kg 48 leh gram 61 an man a, methamphetamine hi kg 44 leh gram 111 manin heroin kg 15 leh gram 192 zet an man tawh bawk a ni. Tualchhunga an hralhna man ang chuan crystal meth hi kg-ah cheng vaibelchhe hu ni a hriat a ni a, methamphetamine hi kg. ah cheng nuai 13 hu a ngaih a ni bawk a, heroin gram khat hi cheng 3,000 chuanga zawrh leh hralh a nih thu dawn a ni. An hralhna erawh hi chu a hmang duh an tam leh tam lohah leh Myanmar atanga lo lut a tam leh tam lovah thui tak a innghat niin an sawi.

Hei bakah hian ganja kg 84 leh gram 913 bakah thalaite'n an hman sual nasat damdawi - Alprazolam, Nitrazepam leh Tramadol bakah codeine telna khuh damdawi thahnem tak man a ni bawk.

He tih lai hian thla thum chhung hian ruihhlo hmansual vangin Mizoramah mi 14 an thi leh tawh a, an zinga 2 hi hmeichhia an ni. Excise & narcotics department-in an chhinchhiah danin kum 1984 a heroin ngai pakhat a thih atanga kumin March thla tawp thleng ruihhlo vangin mi 1,893 an thi tawh a, an zinga 230 te chu hmeichhia an ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



BORDER TALKS

Mizoram leh Assam ramri buaina chingfel tuma sorkar official-te tun thla ni 25 khian Guwahati-ah inbe turin ruahmanna siam fel a ni.

Home department atanga thu dawn danin Mizoram sorkar aiawhte hi official 7 niin, home secretary Pu Vanlalmawia'n a ho ang a. An ruahman dan chuan April ni 24-ah thlawhna hmanga Aizawl chhuahsan a hemi ni veka Guwahati thlen a, inbuatsaih nghal tum a ni a. Mizoram leh Assam official-te inbiakna turah hian ramri buai chungchanga a hma lama lo sawi tawh leh state pahnih la inrem theih lohnate sawiho leh a, kimchang taka thil awmdan inhrilh tawn tura ruahman a ni a. Official-te an inbiakna rah chhuah a zirin Mizoram home minister leh Assam border protection & development minister te a vawi ngana atana inbiakna chhunzawm tura ngaih a ni a. Tun tumah hian ni khat chauh inbiak phawt tur a ni a, thil awmdan a zirin official-te inbiak chhunzawm leh rawt a ni mai thei bawk ni a thudawn a ni.

Puan tawh thin angin kum 2021 July ni 26 a Vairengte dai-a state pahnih Police-te'n silai hial an hmehpuah tak avang khan ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokal in khatih laia home minister Pu Lalchamlia ho Mizoram palaite nen an inbia a. A kum lehah Aizawlah bawk inbe lehin kum 2022 November thla khan Guwahati-ah minister pahnih kaihhruaite hi an inbe leh a. Nikum August ni 9 khan Aizawlah inbe lehin hetah hian kumin March ni 31 hma a inbiak chhunzawm leh tura tih chu an hman ta lova. Official-te inbe phawt se tiin thutlukna siam a ni ta.

Zirtawpni khan April ni 25 a inbiak leh a kal turte hi Mizoram sokarin a tichiang ta chauh a ni.



AMC

Director of Local Fund Audit in kum 2019-20 leh kum 2022-23 tangka kum chhunga Aizawl Municipal Corporation (AMC) sum hman dan a endikna-ah chuan a hek leh mipui sum heu zawnga pawisa tam tham tak hmanna a hmu chuak.

Tuirial a bawlhhlawh paihna hmun - solid waste management centre (SWMC) siamna atan tangka kum 2022-2023 chhung khan AMC hian mimal ta lei laihna khawl (JCB) hman manah cheng vaibelchhe 1 leh nuai 26 vel a seng a. Director of Local Fund Audit on the Accounts of Local Authority report atanga a lan dan chuan AMC hian ama pualin JCB hi 3 an nei ve reng a, 3 zinga pakhat phei chu SIPMIU hnen atanga an dawn a ni nghe Nghe a. Chuti chung chuan bawlhhlawh sawngbawlna hmun tur laihna atan hian ni 255 chhungin cheng vaibelchhe 1 leh

nuai 26 thelh a seng a. JCB pathum zinga pahnih leina atana AMC senso hi cheng nuai 49 chuang hret chauh a nih laiin mimal JCB hmanga cheng vaibelchhe 1 leh nuai 26 vel sen a ni hi an sum endiktu (auditor) te chuan a sum ren loh thlak hle-ah an ngai a. AMC chuan mimal JCB an hmanna chhan chu an JCB neih pathumte a chhiat lai a nih vang niin an sawi thung.

AMC thuneitute chuan an JCB 3-te hi vawi tam tak an siamthattir tawh thu leh a siam chhung hian hun a heh hle niin an sawi a. Hna an thawh hi a hmanhmawhthlak avangin mimal JCB hi an hmang hawh ta mai niin an sawi bawk a. Nitina bawhhlawh ro tonne 93 leh bawlhhlawh ro tonne 20 chuang Aizawl khawpui atanga paih a ngaih avangin hna hi hmanhmawh taka thawh a ngai a ni an ti bawk. Lei laihna khawl leina tur ruahmanna a awm loh avang leh mimal JCB man chawi a hman hi a senso a tlem zawk avanga hmang ta mai niin an insawifiah a ni.

Audit report-ah erawh chuan kum khata man chawi a mimal ta JCB hmang a cheng vaibelchhe 1, nuai 25, sing 7, sang 2 leh 907 sen ai chuan JCB dang 3 lei belh pawh a hlawk fe zawk ni a an ngaih thu tarlan a ni.

(Desk)

<><><>

DISASTER

Aizawl District Disaster Management Authority chairman leh bawrhsap ni bawk Pu Lalhriatpuia chuan Zirtawpni khan inkhawm hmanhmawh kovin, Ngaizel lungtla avanga chhiatna thleng fo thin chungchanga hmalakna tur ruahmanna siam turin Aizawl District chhunga he lam department official-te a inkhawm pui.

Inkhawmah hian Geology & Mining, AMC, DM&R, PWD leh Aizawl Traffic police aiawhte telin, geological team ten a zirchianna an neih tawh atanga lung tlak chhan an zir chhuahte report ngaihthlak a ni a. Kawng hrang hranga hmalakna tur ruahmannate siam niin, a zir chiang tur technical team pawh din nghal a ni.

Hemi ni vek khan DM&R Minister Prof.Lalnilawma chuan Ngaizel lung tla avanga vanduinaw tawh ta Lalbiakdika (24) s/o Lalbiakmawia, Tachhip chhungte hnenah an khuaah kal chilhin zawngnadawmna cheng nuai li a lo hlan tawh bawk a ni.

<><><>